

CARTA NU GUTHEL·LA' APÓSTOL SAN PABLO PARA CA ENNE' COLOSAS

La Epístola Del Apóstol San Pablo A Los

COLOSENSES

1 Inte' Pablo apóstol qui' Jesucristua, porqui'ni á' ná la' calatsi' qui' Tata Dios lani inte',untu ba lani hermano qui' ri'u Timoteo nna, ²rùdià' carti para lebi'i hermanos ca enne' qui' Tata Dios tse'e le' yétsi Colosas nna lebi'i canu ríalatsi' nna ttùba chi ná le lani Cristua. Calátsa'a' qui'ni Dios Padre qui' rí'ua nna gunie le bendecir lani adí favor qui'e á'hua lani la'ÿeni nu runna Jesucristua enne' née Señor lo iyate.

³Tulidàni rue' tu' gracia Dios enne' ná Tata qui' Xana' Ri'u Jesucristua de rexa latsi' tu' le tulidàba lo ca oración qui' tu',
⁴Porqui'ni chi bina tu' qui'ni yala confianza ràppa le lani Cristo Jesús, á'hua qui'ni té la' tsì'ilatsi' lo losto' le lani iyaba ca enne' qui' Tata Dios,
⁵de ribèda le i'yu tsá qui'ni edacca' latsi' losto' le por iyate nu chi beni Tata Dios preparar para lebi'i ÿiabara', dèsideba biyénini le titsa' lí nu rulue' ti'ÿa modo l'á le. ⁶La'a

mísmuba mensaje de salvación nu chi biyénini le, chì huá uccua predicar iÿétse'ní lugar le' yétsiloyu, iÿétse' ca enne' chi ríalatsi' qui' á'hua runi ca seguir ca enseñánzì tì'ba uccua lani lebi'i loti' biyénini le nu cca qui' la' tsì'ilatsi' qui' Tata Dios nna begà'na le seguro qui'ni catsi'ínie le. ⁷Enseñanzì nna bidète' li á por medio de hermano to' qui' ri'u Epafras nu ná compañero tse' qui' tu' le' tsina qui' Señor. Làbi nna tulidàba runi bi iyaba nu rú'ulatsi' Cristua para lebi'i. ⁸Làbi nna gutixà'ani bi intu' ti'ÿa iÿeni ná la' tsì'ilatsi' nu runna Espíritu Santo lo losto' le.

⁹Acca intu' nna dèsideba gùdulo riyénini tu' nu cca qui' le nna, runi tu' oración por lebi'i tulidàba. Rinàbani tu' Tata Dios qui'ni gúnnee iÿénini la' ritel'ni espiritual qui' le á'hua adí la' riyeni tse' qui' le para gúnibia' le tulidàba nu calatsi'e qui'ni guni le, ¹⁰para qui'ni guni le nu ná tse' nu rú'u latsi'e

según nu dàni ca enne' qui' Señor Jesucristua guni ça, para qui'ni la'labàni qui' le nna ccá tì'a ttu yà nu runna fruto tsè' nna gúnibia' le Tata Dios adiru tse'. ¹¹Rinàba huá tu' qui'ni por medio de la'huacca iÿeni qui' Tata Dios nna gata' adí fuerza espiritual qui' le para qui'ni guni le seguir lani paciencia nna la' redacca' latsi' nna màsqui'ba íl-lani iÿetse' ca prueba. ¹²Aÿhua qui'ni hue' le gracia Tata Dios porqui'ni benie qui'ni gal-la' ri'u thi' ri'u nu chi ná prevenido para iyaba ri'u ca enne' qui'e canu ríalatsi' títsa' nu runna la'yani'. ¹³Por la'huacca qui' Tata Dios nna chi bebèqqeie ri'u le' la' rigú'ubia' qui' Satanás nna le' chul-la nna, acca chi gutà'ni ri'u parte lani la' rigú'ubia' qui' Ñi'ni nu catsi'íni áa. ¹⁴Cristua nna chi bedilè ri'u de gùttie por ri'u nna beyuniÿen latsi'e iyaba ca tul-la' qui' ri'u.

¹⁵Tata Dios nna labí posible té ilá'ni ri'u e le' yétsiloyuÿi pero chi bitá Ñi'ni áa gùÿi'e forma de enne'; lèe nna née tì'tabá ná Dios, aÿhua chi dúe ántesca uccua iyáÿia tení nu té. ¹⁶Por medio de Cristua nna beni Tata Dios iyaba nu té ÿiabara' aÿhua yétsiloyu nna, tàntua iyábani nu rila'ni ri'u aÿhua canu labí posible té ila'ni ri'u, iyaba clase de la' rigú'ubia' nna ca poder espiritual lani la'huacca qui' qui' l-le, pues iyaba ça nna uccua ça por medio de lèe, aÿhua para qui'ni gudàliani ça ne. ¹⁷Cristua nna chia dúe ántes calá uccua iyaba ca cosa, aÿhua lèe nna runie dirigir lani órden tse' iyaba nu té, por la'a mísmuba la'huacca qui'e. ¹⁸Cristua

nna née enne' nu adiru dacca' para lani ri'u, tì'a ttu cabeza lani cuerpo. Ri'u nna ná ri'u iglesia qui'e; lèe nna née la'labàni para ri'u porqui'ni lèe nna née enne' beyatha primero de lo lù'uti de lo iyábani canu chi gùtti, acca la'a labée nna née adiru enne' ÿeni lo iyábani. ¹⁹Cristua nna née itútení nu ná Dios, porqui'ni a' calatsi' Dios. ²⁰Por medio de Cristua nna hua té modo para gùttse'e tsì'e iyáÿia tení ca obra nu benie lani la'a labée, tàntua nu té le' yétsiloyu aÿhua nu té ÿiabara' nna, por lù'uti qui' Cristua lo curútsia.

²¹Ttu cuaÿa nuá nna labí nabia'ni le Tata Dios, aÿhua por la' rulábalatsi' mal qui' le nna ca tul-la' nu beni le nna acca labí uccua guyu li e, pero annana chi benie qui'ni beyacca tsè' le lani e nna, ²²chi ná le amigo lani e por medio de lù'uti qui' Ñi'ni áa loti' uccua cuerpo qui'e sufrir. Anía uccua para qui'ni lebi'ÿi nna tsé'e le ru'a lúe completamente nàri, labiru biÿa falta cu'u le nihua labí biÿa tul-la' etseláni Tata Dios contra le, ²³canchu bittu gútse'e latsi' le títsa' qui' Tata Dios nu chi ríalatsi' le, sino litse'e tsittsì tulidàba lani ca enseñanza qui'e nna bittu gúdu chùppaniq le, porqui'ni seguro ni ná ca bendición nu thi' le tì'a ra lo títsa' nu runna salvación nu chi biyéni le, pues uccua predicar entre ca enne' tse'e le' iÿetse' ca parte qui' yétsiloyu. Inte' Pablo nna runia' duel-la' qui'ni iyénini adí ca enne' títsa' qui'e.

²⁴Yala redacca' te' de ccà'a' sufrir por iyaba le de runia' ne servir, porqui'ni a' modo nna runia' seguir lani ca sufrimiento qui' Cristua

para iglesia qui'áa nna ccá çà cumplir adí por medio de inte' nna thi' le nu ná cuerpo quì'e adí bendición. ²⁵Acca Tata Dios nna guthel'le'e inte' para gunia' servir iglesia qui'e nna bethà'ne latsi' nàya' para gunia' tsinì para bien qui' le de riquixa'ánia' le itúyiate nu rulue' titsa' qui'e, ²⁶ca enseñanza nu lanú nuya chi benibí'á dè'sdeba ca tiempo chía gutsà, pero annana chi nà declarado claru tení por primera vez lani ri'u ca enne' qui'e, ²⁷porqui'ni calatsi'e qui'ni gunibia' ri'u la' rulábalatsi' qui'e nu labí nabia'ni ri'u antes ti'iyã tse' gani nà para lebi'i ca enne' qui' adí ca nación, qui'ni Cristua nna due lo losto' le para qui'ni tsé'e le lani e yíabara' làti ná la'yani' tulidàba.

²⁸Meru gani Cristua enní'á' runi tu' predicar dàcca'lo ca enne'. Riquixà'ani tu' iyábani ca enne' qui'ni da' peligro lo canu labí ríalatsi' qui, à'hua ruluè'ni tu' çà nu ra lo titsa' qui' Tata Dios por medio de la' ritelíni nu runne qui' tu', para qui'ni ttu ttu tsa ca enne' nna gata' oportunidad qui' qui' ccá çà enne' tse' ru'a lúe por nu beni Cristua para ri'u. ²⁹Para nui nna acca rue'él'la' látsa'a' riquixà'a' titsa' qui'e lani itute látsa'a' por medio de fuerza iyéniní nu runne quia' por la'huacca qui'e lani inte'.

2 Calátsa'a' cca le saber qui'ni yala duel'la' runia' hàsta cca'a' sufrir para qui'ni thi' le adí bendición, à'hua para ca hermanos tse'e le' yétsi Laodicéa nna iyaba ca hermano canu labí nabia'ni cabi inte' nna, ²qui'ni ccá ttùba la' rulábalatsi' qui' cabi nna gata' la'

tsi'i latsi' qui' luetsi cabi nna gappa adí ánimo lo losto' cabi, à'hua qui'ni gata' adí la' ritelíni qui' cabi para qui'ni thi' cabi adí la'yeni lo losto' cabi nna gunibia' cabi Cristo enne' runi Dios Padrea declarar le' yetsiloyu por primera vez. ³Cristua nna née llave nu rithàlia para ri'u itúyiani la' riyeni tse' nna la' ritelíni lígani nu uccua gáttsi' ba antes. ⁴Riquixa'ánia' le nui para qui'ni làa tsíalatsi' le attu te ca titsa' huaya' nu rulue' canu yala tse' rudà rú'a qui' inne çà. ⁵Màsqui'ba inte' nna nùtu'a' té làti tse'e le, pero redacca' látsa'a' tì'atsi du ba' lani le porqui'ni yua' qui'ni iglesia qui' le nna díá lani orden de tse'e iyaba le tsíttsi ríalatsi' le Cristua.

⁶Chi beni le recibir Jesucristua para quée Xana' le, acca liguni qui'ni ccá la'làbani qui' leuntu ba lani lèe ttu ttu tsá, ⁷tì'a ttu yà nu du tsíttsi ni porqui'ni dia l-lúj itettia, à' tehuá ná qui'ni gudàxu' lo losto' le ca enseñanza lígani qui' Cristua nna iyèni le espiritualmente taá tì'a chi bidète' le nna ccá le listo tulidàba para hue' le gracia Tata Dios. A' modo nna ccá le adí tsíttsi lani e, tì'a ttu yú'u nu ratha lo cimimiento qui'j.

⁸Lihue' cuidado qui'ni làa thacca'yí le por ca titsa' sabio nu rinne ca enne' pero labí ri'yù' la' rulábalatsi' qui' qui' porqui'ni rulue' çà ca costumbre canu belue' ca enne' chía gutsá nna ca enseñanza nu rulue' ca religión le' yétsiloyuj. Pero lebi'j nna liudà naga' le nu ra Cristua.

⁹Porqui'ni Cristua dè'sdeba neru nna née tì' tabá ná Dios lani itute

la'huacca qui'e nna, chi bitée uccuee ènne'yu'. ¹⁰Acca de chi ná le ttùba lani Cristua, iyábani ca bendición de ÿiabara' nna ná ca para lebi'ì. Cristua nna adiru poder té qui'e tì'chu iyábani canu rigú'ubia', adiru la'huacca té qui'e tì'chu iyábani ca ángeli nna ca espíritu malo nna. ¹¹A'hua de chi ná le ttùba lani Cristua nna chi ná le circuncidado, pero aláa luetsi marca de circuncisión nu runi báni ca enne' lani gutsílu, sino nu beni Cristua lo losto' le de bitua fuerza qui' la' ridálatsi' mal nu gulú'ubia'niá cuerpo qui' le antes, por nui nna rulue' qui'ni chi ná le enne' qui' Tata Dios. ¹²De uccua le bautizar nna chi ná le ttùba lani lù'uti qui' Cristua nna bigàtsi' le lani lèe, a' tehuá beyaccabàni le lani e ttu la'labàni cubi por medio de la'huacca qui' Tata Dios lo losto' le loti' huáalatsi' le qui'ni bechìthe Cristua de lo lù'uti. ¹³Lebi'ì nna uccua le ttu cuaḡa nuá nu yatti espiritualmente taá porqui'ni gutsé'e le le' ca tul'la' qui' le nna belue' qui'ni labí uccua le enne' qui' Tata Dios. Pero annana chi bènne la'labàni cubi qui' le juntu ba lani Cristua de beyuniḡen latsi'e iyaba ca tul'la' qui' le. ¹⁴Iḡé vuelta nna beni ri'u contra nu ra lo ley de Moisés nna chi ná ri'u condenado. Pero para lani Tata Dios nna chi bèḡie itute lista xeni nu ga'na escrito contra ri'u nna gùtue iyate nua' loti' gùde na lani clavu iquiqua ra' cuerpo qui' Cristo lo curútsia.

¹⁵A'hua de gùttie lo curútsia nna gùtue la'huacca qui' iyaba canu runi ca contra e, hàstaa la'huacca

qui' ca espíritu malua gùtue na benie iyaba ca vencer dàcca'lo taá para qui'ni iyaba ri'u nna ccáyen latsi' ri'u qui'ni labiru la' huacca té qui' qui' contra ri'u.

¹⁶Rena ca enne' qui'ni cca le condenar porqui'ni labí ri'ya ro le según ca regla religiosa qui' qui', a'hua porqui'ni labí rigua le ca tsá ḡeni qui' qui' o biḡa ca tsá ní qui' ttu ttu biú' l'le ttu ttu semana l'le. Pero lebi'ì nna bítturu gudà naga' le qui' qui', ¹⁷porqui'ni ca reglì nna uccua ca para miéntras teruba nna beni ca representar ca bendición nu chì da'la, pero de bitá Cristua nna chi uccua ca cumplir. ¹⁸Acca bítturu guni caso le qui' canu calatsi' qui' cca le adí enne' obediente qui' qui' nna guni la le adorar ca ángeli nna bítturu edacca' latsi' le por Cristua. Ca enni'a nna yala rebàta' ca tì'atsi yala enne' dacca' chi ná ca de rena ca qui'ni chi bilá'ni ca ca cosa milagrosa, pero de balde ba rulaba latsi' qui' ca cosḡ porqui'ni labí fundamento té qui' qui' por nu rinne ca nna, ¹⁹labí runi ca seguir ttùba lani Cristo. Lèe nna née cabeza qui' iyaba ri'u tì'a ná ttu cabeza lani ca parte qui' ttu cuerpo nna juntu ba ná ri'u ttùba lani Cristua enne' runie ri'u alimentar por ca titsa' qui'e nna riḡèni ri'u espiritualmente taá según la' rulábalatsi' qui' Tata Dios.

²⁰Chi gùtti le lani Cristua nna chi gulà le le' ca la' rulábalatsi' nu labí dacca' iḡu' qui' yétsiloyuḡ, biálácca runi ba le tì'atsi ná rù le ttùba lani canu yétsiloyuḡ nna runi le obedecer ca costumbre nu runi ca seguir. ²¹Por ejemplo rena ca: Labí

cca go le nuá, nìdiruba làa guláppa' li á, bittu guláppa' le ca cosá' porqui'ni ná tul-la' canchu guni le á'. Anía rena ca. ²²Pero ri'u nna hua yù ri'u qui'ni nu dacca' go ri'u nna tté bá conforme dia ba ri'u ruquina' ri'u á acca labiru la'huacca té qui' qui, pues iyaba ca mandamíentua' nna ná lá ca enseñanza nu chì' gulèqquia ba iquua ca enne'. ²³Ca reglá' nna rulue' tì'atsi ná ca qui' ca enne' canu hua té tí'bá la' riyeni qui' qui, porqui'ni rulue' ca tì'atsi runi ca Tata Dios adorar hàsta por obediente nna runi dí' láti qui' de rulaba latsi' qui' qui'ni por á' modo nna ccá ca enne' adí santo. Pero iyaba nu runi ca nna labí la'huacca té qui' qui' para làa gúniíru ca ca vicio qui' qui.

3 Lebi'ì nna chi té la'labàni cubi qui' le lani Cristua, porqui'ni loti' beyáthe de lo lù'uti nna beyátha hua le lani e. Acca liudua iquua le ca cosa qui' ÿiabara' làti rigú'ubia' Cristua juntu ba lani Tata Dios. ²⁻³Dàni le gulaba latsi' le nu cca qui' ca cosa qui' ÿiabara', bittu gulaba xàttàga latsi' le nu cca qui' yétsiloyu, porqui'ni lebi'ì nna labiru la'labàni té qui' le para ca cosa qui' yétsiloyu. Labí rilá'ní anna tì'i'ya ccá la' labàni qui' le, pero la'labàni qui' le nna ná seguro ttùba lani Cristua nna ttùba lani Tata Dios nna. ⁴La'a mísmuba Cristua ènni'a née la'labàni para ri'u, canchu chi íllanie attu nna, gulue'ní qui'ni té la'labàni nu labí tíá qui' ri'u nna tsé'e ri'u lani lèe le' la'yáni'a.

⁵Acca dàni le cueqquia cuenta lasi' le tì'atsi chi ná yatti iyaba ca la' ridàlatsi' mal qui' le, por ejemplo:

bittu thualàni le nu labí ná tsèla le, bittu guni bi'ya la' rulábalatsi' cùttsi nihua bi'ya cosa nu runna la' réttu'ló, nihua bi'ya attu cosa nu labí ná nàri. A'hua bittu ccá le nu dàa latsi', porqui'ni ná tulappa ba lani ca tul-la' qui' canu runi adorar ca ídolo. ⁶Fuerte ni ná castigo nu ithèl-la' Tata Dios iquua iyaba canu labí ríalatsi' porqui'ni runi ca ca cosá'. ⁷Iyaba ca cosa mal na' beni le ttu cua'ya nuá nna yala guyú'u latsi' le ca. ⁸Pero annana ná qui'ni gútse'e latsi' le ca tul-lá', por ejemplo: la' iquua l-la nna, la' rigua la' l-la lo losto' le nna, la' hueyudí' enne' nna, la' hueduadí' nna, a'hua la' huenne titsa' cùttsi nu ché' la' réttu'ló nna. ⁹Bittu gúni latsi' le nna bittu guthacca'ýí luetsi le porqui'ni chi bétse'e latsi' le nu uccua le antes lani iyaba ca cosa mala'. ¹⁰Chi gùdulo le lani la'labàni cubi qui' le nna chi ruttsiání modo qui' le para cca le enne' tse' tì'a Tata Dios enne' benie le née enne' tse', hàsta qui'ni gunibia' li e lani la' ritelíni. ¹¹Lu' nu chi té la'labàni cubi qui' lu': labí dacca' lu' adiru tì'chu hermano qui' lu' màsqui'ba canchu ná lu' de raza judío o canchu ná lu' de raza griego, nihua canchu ná lu' circuncidado o canchu labí l-le. Lebi'ì canu ccani le ittsi nna labí dacca' le adiru tì'chu adí ca hermano canu ná ca enne' idittu'. Nihua labí dacca' ttu patrón ru'a lo Tata Dios adiru ti'chu ttu mozo, porqui'ni làteruba Cristua nna née enne' adiru dacca' para iyaba clase de ca enne' nna due lo losto' iyaba canu ríalatsi' qui' ne.

¹²Tata Dios nna yala catsi'ínie le nna chi becuí'e le para cca le

enne' qui'e. Acca liulue' qui'ni chi ná le enne' de la' retúalatsi' nna enne' tse' lani iyábani ca enne' nna. Bittu cani le qui'ni adiru dacca' le tì'chu adí ca hermano, sino ga'na le dispuesto guchia le nna cca le sufrir en lugar de til'la le lani nuỹa, a'hua cca le enne' de iyéniní paciencia lo iyábani nu íl'lani. ¹³Liucuèda tí' rú'a le para qui'ni làa inne le ttu titsa' idí'latsi'. Bittu eyà'na le lani la' ritsa'áni lo losto' le, sino eyuniyén latsi' le nuỹa tediba hermano nu beniã biỹa contra le. Tì' tehuá Cristua chi beyuniyén latsi'e iyaba ca tul'la' qui' le, a'hua lebi'i nna ná qui'ni eyuniyén latsi' qui' ttu le nna attu le nna. ¹⁴A' ná qui'ni guni le, pero liulue' qui'ni té la' tsì'ilatsi' lo losto' le lani iyábani, a' modo nna cca le ttùba sin biỹa estorbo entre lebi'i. ¹⁵Lihue'él-la' qui'ni Tata Dios gunie le dirigir, lèe enni'a nua' runne la'yeni lo losto' canchu yetsi' ba ná la' rulábalatsi' qui' ttu le nna attu le nna, porqui'ni bel-luítse' le para tse'e le lani la'yeni, yà'ni qui'ni chi ná ttu ttu tsa le parte qui' ttùba cuerpo qui'e. Liulue' qui'ni cca le agradecer por nu runna Tata Dios qui' le.

¹⁶Liurexa latsi' le tulidàba nu ra lo titsa' qui' Cristua para qui'ni gata' la' rulábalatsi' tse' qui' le. Liuthète'ni luetsi le ca enseñanza qui'e nna egú'u néda luetsi ttu le nna attu le nna lani ttu modo tse'. Ligùl-la lani la' redacca' latsi' ca salmos l'le ca himnos l'le ca coro espiritual l'le de rudàliani le Señor. ¹⁷Iyaba nu runi le nna a'hua iyaba nu rinne le nna, éxalatsi' le qui'ni cca le pertenecer lani Señor

Jesucristua nna, hue' le gracia Dios Padrea lani nombre qui' Cristo enne' due ru'a lúe para ri'u.

¹⁸Annana rinénia' lebi'i ca niula: Nuỹa tediba niula nu chi dua nubeyu' qui'i nna, dàniã guniã respetar derecho nu té qui' nubeyu' qui'i para íchi'a na lo néda, porqui'ni deber qui' ttu niula cristiana nna ná qui'ni guniã obedecer nubeyu' qui'i. ¹⁹Annana rinénia' lebi'i ca nubeyu': Nuỹa tediba nubeyu' nu chi dua niula qui'i nna dàniã catsi'íniã niula qui'i nna gúlu'e'a qui'ni té la' tsì'ilatsi' lo lòstu'i para lã. Bittu inne lu' titsa' idí'latsi' lani niula qui' lu'. ²⁰Lebi'i ca huatsa cuítì', liudà naga' le qui' tàta nàna qui' le nna guni le obedecer iyaba nu calatsi' qui' qui'ni guni le, porqui'ni a' rú'ulatsi' Señor. ²¹Lebi'i ca tàta nàna, bittu quítsa' le ca yì'ni le tulidàba para gutsa'áni le iquua qui', porqui'ni a' modo nna demasiáduni edúl-la'a latsi' qui'. ²²Lebi'i canu runi tsina qui' enne', liguni obedecer iyaba nu rena ca xana' le qui'ni guni le, pero alàa tsua' teruba canchu chi rinna' ca le para cuádi bá iria tse' le ru'a lo qui', sino lani itute losto' le guni le xana' le servir nna chía yù le qui'ni Tata Dios nna rilá' banie le. ²³Biỹa tediba tsina ní guni le nna, liguni a' tse' lani itute losto' le ti'atsi Xana' le Jesucristua due lani le nna runi li a' por lèe, alàa solamente por ca enne'. ²⁴Anía ná qui'ni guni le porqui'ni chía yù le qui'ni Señor nna gunnee qui' le nu ràl-la' le thi' le nna edácca'ni le por ca cosa tse' nu tuànie para lebi'i, porqui'ni Jesucristua enne' runi le servir nna

née Xana' nu adiru dacca' qui' le.
²⁵Pero canchu labí runi lu' nu ná tse' lani ca enne' nna, pues Señor nna gunna huée qui' lu' nu ná qui'ni thi' lu' por mal nu beni lu' nuña tediba ná lu', porqui'ni bihua runie ri'u tratar según de nu rilá'ni ri'u de lo ra'.

4 Lebi'i canu ná patrón: cca le enne' tse' lani canu runi tsina qui' le, liguni según nu ná tse' lani ca. Liurexa latsi' le qui'ni a'hua lebi'i nna ná qui'ni gute le cuenta ru'a lo Jesucristua enne' née Xana' le.

²Iyaba lebi'i nna, bittu cca le enfadar guni le oración sino tsé'e le al tanto tulidàba para inàbani le Tata Dios por iyaba clase de necesidad nu té qui' ca enne', a'hua para hue' li e gracia. ³Linaba huáni Tata Dios lani oración por intu', qui'ni gappa tu' neda para quixá'a tu' titsa' qui'e, para qui'ni ccá saber iyábani ca enne' qui'ni por medio de Cristua nna hua té salvación para làca. Inte' nna runia' predicar titsa' qui'e, acca tí'a' litsi iyyi. ⁴Pero liguni oración qui'ni gappa' valor quíxa'á' iyaba nu cca qui'e lani la' ritelíni, porqui'ni nui ná deber quia'.

⁵Cca le ejemplo tse' nna líhue' cuidado tì'iya inne le nna tì'iya guni le nna canchu tse'e le lani canu labí ríalatsi'. Liguni aprovechar iyaba ca oportunidad para guni le nu ná tse' para iyábani ca enne'. ⁶Ná qui'ni ccá tse' titsa' qui' le para qui'ni iyeni tsè'ni ca enne' nu rena le, tì'a ttu la'gó gudàl-la ri'u dete' lúj nna runña sabor. Canchu inàba ca para ccá ca saber adí, pues ná qui'ni ecàbini le ca pero lani la' ritelíni nna lani modo nna.

⁷Hermano tsè'ni qui' ri'u Tíquico nna quixá'a'ni bi le tì'iya ná la' ritè quia' canchu chi el-lani bi làti tse'e le. Làbi nna yala fiel runi bi cualàni, a'hua compañero tse' ná bi quia' lo tsina qui' Señor. ⁸Inte' nna rithèl-la'a' bi làti tse'e le para quixá'ani bi le biya ritte tu', a'hua para eyúnna bi adí la'yeni lo losto' le. ⁹Hermano tsè'ni qui' ri'u Onésimo enne' látsi líq' nna yala fiel runi huá cualàni nna dá' huá lani Tíquico. Làcabi nna quixá'a'ni cabi le iyaba nu cca qui' tu' nì la.

¹⁰Aristarco compañero tsè'ni quia' enne' tée lani a' litsi' iyyi rithèl-la' hua bi la' rinàba titsa' qui' le. A'hua Marcos enne' ná primo qui' Bernabé nna rithèl-la' hua bi la' rinàba titsa' qui' le. Liguni huá Marcos recibir tse' canchu chi itá bi làti tse'e líq' tì'a chi bel-luít'sa' le dèsdèba antes qui'ni guni le.

¹¹A'hua Josué enne' lá huá bí Justo nna rithèl-la' hua bi la' rinàbatitsa' qui' le. Josuéa' lani Aristárca' nna Márcua' nna yala la'yeni reyúnna cabi inte', pues entre ca creyente de raza judío nna làteruba làcabi riquixa'a huá cabi nu cca qui' Tata Dios nna la' rigú'ubia' qui'e nna.

¹²Epafras enne' látsi líq' nna ná huá bi obrero tse' qui' Cristua nna rithèl-la' hua bi la' rinàbatitsa' qui' le. Làbi nna tulidàni rinàba bi por lebi'i lani oración, yala ratta'yúni bi Tata Dios qui'ni lebi'i nna cca le tsittsì nna gata' adí la' ritelíni qui' le nna guni le tsè' iyate nu calatsi' Tata Dios qui'ni guni le. ¹³Epafras nna yala obrero tse' ná bi para bien qui' le nna rexa latsi' bi le tulidàba a'hua chi bilá' te' qui'ni

yala retúa latsi' bi ca hermanos tse'e le' yétsi Laodicéa nna a'hua ca hermanos tse'e le' yétsi Hierápolis nna. ¹⁴Hermano querido qui' ri'u Lucas enne' ná médico nna, rithèl·la' hua bi la' rinàbatitsa' qui' le, a'hua hermano qui' ri'u Demas nna.

¹⁵Liute tsàtè' iḃéniní la' rinàbatitsa' qui' tu' lani ca hermanos tse'e le' yétsi Laodicéa. Liute huá saludo qui' tu' lani hermana Ninfas a'hua lani iyaba ca enne' rialatsi' retùppa le' litsi' bíḃa'. ¹⁶Bitola de gul·la le carti nna, calátsa'a' qui'ni gute lí a lani ca

hermanos nu runi formar iglesia re' le' yétsi Laodicéa para qui'ni gul·la huá ca na. A'hua attu carta huaya' nu guthél·la'a' lani ca hermanos tse'e le' yétsi Laodicéa nna, càhua látsa'a' gul·la li a lani iglesia qui' le. ¹⁷Ligàtsi tsàtè' Arquipo iḃi: Bèni cumplir tsè' tsina nu betha'na Señor latsi' ná' lu'.

¹⁸Inte' Pablo rudíania' le annana lani propio gani nàya' nna rithél·la'a' la' rinàbatitsa' qui' le. Bittu iḃùl·lani le qui'ni tí'a' preso. Tata Dios nna gunie le bendecir. A' bá ná.